

Sarajevo, 01.06.2016

INICIJATIVA

POSLANIK: MARIO VUKASOVIĆ

Pitanje upućeno : Vlada KS, Ministarstvo za obrazovanje, nauku i mlade KS

Inicijativa :

Druga inicijativa se također odnosi na Studentski centar.

Želim da vas upoznam da se u Studentskim domovima vrši zastrašivanje svih studenata koji su se usudili progovoriti protiv direktora Kadrića.

Ti studenti su se usudili reći javno da je stanje u Studentskim domovima katastrofalno a u domovima ih je nakon nekoliko dana dočekala opomena pred isključenje iz domova.

Student Haris Silajdžić iz Goražda je dobio opomenu pred isključenje iz studentskih domova zbog izazivanja buke i nemira u svojoj sobi iako taj dan uopće nije bio u Sarajevu nego kući u Goraždu.

U opomeni koju je dobio navodi se da je policija dolazila i napravila zapisnik o događajima te da će biti isključen iz domova ako se nešto slično ponovi.

Haris je otišao u policijsku stanicu da provjeri navode o prijavi i tamo su mu rekli da nemaju nikakvu prijavu u domovima za datum koji se navodi te da nisu zaprimili nikakav poziv.

No, na direktorovu nesreću čovjek je taj dan preuzeimao vozačku dozvolu u Goraždu, išao na trening stonogtenisa te cijeli vikend proveo u Goraždu za šta posjeduje i materijalne dokaze iz MUP-a te niz svjedoka koji mogu potvrditi da je on zaista bio u Goraždu taj vikend.

Upućujem inicijativu ministarstvu obrazovanja da provjeri sve ove navode te pokrene radnje u svojoj nadležnosti ako se utvrdi da direktor vrši ovakvu nedopustivu vrstu pritisaka na studente.

Molim vas da izvjestite Skupštinu u narednih mjesec dana da li su ove tvrdnje tačne te koje su radnje poduzete.

Studentski Centar Sarajevo

Federacija Bosna i Hercegovina

Bosna i Hercegovina

n/r predsjednik disciplinske komisije

n/r direktor Studentskog Centra

Predmet: Žalba na izrečenu disciplinsku mjeru

Poštovani,

obraćavam Vam se u svrhu dokazivanja da ja, Haris Silajdžić, te večeri i jutra sa 17.04.2016. na 18.04.2016. god. nisam bio dio neprihvatljivih aktivnosti koje su se odvijale u mojoj sobi (221) koje su kako recepcija tako i policija uspjeli kako-tako smiriti i pri tom, za divno čudo, ne napraviti zapisnik. Događaju u BPK, u općini Goraždu, u čijem MUP-u sam lično prisustvovao i potpisao preuzimanje vozačke dozvole 18.04.2016. god., što Vam dostavljam u **prilogu**, kao i izjavu cimera koju je dao prije nekoliko dana, tačnije 26.05.2016. godine, i koja se nalazi u upravi studentskog doma Nedžarići do koje nisam uspio lično doći.

Obzirom da postoje „nagađanja“ da sam, nakon dolaska recepcije i policije, otišao iz doma i zaputio se u Goražde, odgovorno tvrdim da se to nije desilo što možemo vrlo lako provjeriti pregledavajući snimke nadzornih kamera u domu, kao i izjavu člana moje porodice, gospođe Šerife (Ljukovac) Korjenić, u užim porodičnim krugovima poznatija kao nena, kod koje sam pio kahvu u večernjim satima te nedjelje 17.04.2016. godine prije nego sam se sa djevojkom zaputio u grad sa babovim automobilom marke KIA RIO u grad u kojem su me snimile, pored određenih nadzornih kamera do čijih snimaka, također, možemo doći, ako bude potrebe, naravno snimili i osmijesi konobara u jednom poluelitnom kafiću na samoj raskrsnici u centru općine Goražde. Obzirom da sam se, zbog dužeg druženja, zadržao malo preko granice normale u izlasku u voljenom gradu na Drini moja mama, dipl. ecc. Nusreta (Korjenić) Silajdžić, me je nazvala i pitala kada će doći kući, a ja sam rekao da ne znam. Transkript razgovora možete potražiti od strane državne kompanije BH Telecom, za koji će Vam biti potreban sudski nalog i također možete potražiti sa koje bazne stanice je mobilni uređaj primio signal u toku obavljenog razgovora. Dana 16.04.2016. godine sam u popodnevnim satima tačnije od 17:00h do 19:00h po lokalnom vremenu sa svojim bratom, dr. med. gin. Muedinom Silajdžićem, i njegovim sinom Makom Silajdžićem išao na trening stolnog tenisa, u kojem sam vrlo dominantan već treću godinu zaredom kako u općini Novo Sarajevo tako i u domskim turnirima. Također i od njih možete uzeti izjave, pogotovo od malog Maka koji ima svega 6 godina (kažu da djeca ne umiju lagati) da Vam i on potvrdi da sam bio u Goraždu cijelog vikenda, a imajte na umu da biste rasplakali malo dijete da me ostavite bez krova nad glavom i sigurnog utočišta u ovim nemilosrdnim uvjetima života na ulici bez toplog obroka i vrelog srca tete koja nemilosrdno skida bonove i u pola mjesec ostanem bez istih.

Što se tiče „nagađanja“ da sam, ovu potvrdu iz **priloga** falsifikovao, molio bih Vas da i njen porijeklo temeljito ispitate i protiv mene podnesete odgovarajuću krivičnu prijavu prema predviđenim članovima 393., 394. i 397. Krivičnog Zakona Federacije Bosne i Hercegovine ("Službene novine Federacije BiH", br. 36/03, 37/03, 21/04, 69/04, 18/05 i 42/10).

Na insinuacije upravnice studentskog doma Nedžarići da je isvijesni Haris Bajrić spavao u mojoj sobi, nakon što se razdužio tj. ilegalno boravio u domu, se branim činjenicom da nisam homoseksualac u čije dokazivanje ne bih zalazio.

Za prethodno navedene prijedloge, kako da provjerite gdje sam bio i šta sam radio, nemate nikakve potrebe, jer moja riječ je vrijedna za razliku od većine kako stanara pa tako i članova pseudo udruženja koju sačinjava nekolicina neadekvatnih, ali podobnih tzv. studenata.

Nadam se da su dokazi mjerodavni, te Vas iskreno molim da uzmete u obzir i moj dosadašnji boravak u domu te kao korisnika usluga Studentskog Centra Sarajevo, prema kojem sam sve obaveze uredno obavljao i da sam svojim ponašanjem u skladu sa svim općim i domskim odredbama/ propisima mogao biti primjer uzornog studenta i stanara te da nikad **nisam** dobijao bilo kakvu disciplinsku mjeru.

S poštovanjem,

Haris Silajdžić

Sarajevo, 31.05.2016. godine

Dostavljeno:

- Naslovu 2x
- a/ a

Prilog:

- Potvrda iz MUP-a BPK-a o preuzimanju vozačke dozvole dana 18.04.2016. god.